

曾忠襄公文集

曾忠襄公文集卷下

重修湘鄉縣東臺山文塔記

國朝崇尚正學詔天下郡縣咸立學宮奉祀至聖先師朔望肅
瞻拜之儀春秋申豆遵之敬禮至備典至隆卽三代泮水膠庠
之設未有如此其盛也士之厚沐聖澤者易鬻陵而爲儒雅化
桀鷲以進於沖和雖海澨山陬窮荒僻壤罔不與鄒魯同風竊
維漢唐以後鄉舉里選之法不行全恃制科得人以臻上理洎
於我

朝中葉科目亦云盛矣然其間弋獲之多寡固有幸不幸焉或
取之如拾芥或望之如登天於是主持風雅者遂將以人力奪

造化之窮往往擇學宮之東南立文昌高閣於巽方建七級崇塔於丙丁方培植文筆亦足使椎處之流奮志於青雲之上爲桑梓宗族交游光寵凡崇信斯術者遂以爲驗而有徵僉曰頽則廢修則興其理有不爽者究之一邑之盛衰果繫乎此與否殊不可憑然要不得不藉已往之跡以爲之憑也將欲畫一人心俾多士各自致力於虛衷嚮往之途以爲依歸則又安可少此乎哉吾邑爲古龍城連山之下漣水出焉自東至西綿亘四五百里南與北亦必窮兩日之力而後可以環轍其中積學之士或老於牖下而不能博一矜或十入棘闈而不一膺鶚薦不知凡幾乃羣視爲固然若無足怪者方自咎所業之不精絕無

微倖求進之念此其用心良厚習俗極純殆非科名鼎盛之域所能幾及矣查縣署之西三里舊有學宮曠野託其後漣水橫其前隔岸之東名曰東臺山有文昌宮踞其巔是山逆行而西十餘里狀若列屏屹峙眉睫對照學宮

國初曾修文塔於其上閱百數十年雨淋日炙而頽其頂邑紳憫惻難安重議修復蓋有年矣乃以艱於釀金鳩庀未能就緒固知猝然莫可興辦也先是道光丁酉年東臺山之文昌宮坍塌四圍鄉先輩集資修葺越二歲己亥落成是科鄉闈獲售者吾邑得七八人後遂稍替焉今又四十一年矣適值文塔竣工獲售者又復六七人後先輝映如同一轍豈運會固無往而不

復耶要亦人謀感應之所致也吾鄉土瘠民貧素少富商大賈之業農工而外莫不世守青氈父以是傳之子兄以是勉其弟雖畢生潦倒場屋而終不肯廢佔畢之學君子固窮良可慨矣是以邑中每有義舉籌畫經費萬倍艱難此次重修文塔百計經營居然成於不日豈非邑侯德政之所感歟吾聞有善教者而後可得民心侯實有焉侯姓李氏名惟丙字瑞南江右之蓮花廳人也宰湘鄉凡三載善政不可枚舉遐邇稱頌異口同聲人人有來暮之歌不僅士林愛戴也其時相助爲理學官楊圭攢劉時暢在湘司鐸十餘年士心悅服至於董是役者實吾邑三里之傑潘生鄰臣尤爲出力例得附書姓氏於後

湘鄉試館記

湘鄉爲古龍城居湘潭之西鄙爲坊三分都四十有四東至長沙二百里迤西而上毗邵陽界嶺約三百餘里山有連峯紫雲之峻水有瀟溪漣江之清源出連山經婁底左旋與永豐之水滙於江口過東臺折行百里出河口入於湘其民多勤執業讀書習武而外咸務農工不願棄本逐末人心風俗有籍可稽者已歷二千年而不澆合十姓百名成爲習尙大率挺然自立而不肯爲不義屈卽有子子爲義者思欲屈而下之不能也士皆特立獨行無論身之遇不遇業之精不精名之立不立各抱百折不回之操自束髮受書以至頭童齒豁而不懈其志是以三

百里內五百年間代有傳人亦有等身之著述特未必行之俱
遠耳漢大司馬蔣公琬以純粹之姿佐偏安之業震耀古今厥
後運會有盛衰隆替之不同人才因而有聚散短長之各異學
術分內外純駁氣節有激烈從容名譽有大小虛實要之可欽
者萬而可訛者無二三焉洎乎曾文正公恪守鄉先輩矩度與
同時忠義奮發之宿儒率漣湘子弟數萬人上輔

聖清下蕩十餘行省稽誅之強寇易亂爲治轉危爲安南踰百
粵五嶺東暨全楚三吳兩浙七閩轉戰關隴齊豫燕晉西迄三
峽滇黔又西北薄雪山戈壁五戎百狄之域固無一不仗湘人
師武臣力挈已失之疆土以還之

朝廷而皆口不言功吁何其盛也竊計三十年之間鄉人出而爲士卒歷東西南朔更番迭代勤勞王事者爲數不下二十餘萬人兄戰死於前弟鬪傷於後在外則流爲無定河邊之骨在里則時聞老父慈母及垂髫孤寡哭泣之聲幾於比戶皆是大約捐軀疆場及積勞病歿軍次者不止六七萬人其存者雖飢餓無以自活靡所告訴而終不悔親上死長之初心固由於風俗尙義之所積迄今追憶前徽亦良苦矣是宜爲採風問俗者之所矜憫書之竹帛紀之

國史以昭告來茲者也湘邑學額僅中縣科第之盛不如他邑而應試者特多自道咸以迄今茲每歲應文童試者約三千人

應武童試者約八百人大比之年應鄉試諸生五百餘員昔乘一葉而來無泊舟之所今則小西門外有賓興碼頭矣昔擔兩簷而至無駐足之地今則儲備倉後有試館矣昔提籃於柵門外歧立久候今則貢院東街有坐棚矣至於歲修經費則有講讓堂之賃租也各軍死事者忠魂毅魄容或其家俎豆馨香莫之能繼則有昭忠祠二忠祠彭公祠春秋二祭各立木主而祔祀之也郭公湘潭人隸湘鄉部將而殉難最苦宜祔於後廊此廟乃湘鄉表忠之地而於潭與郭無與也旌已往之忠義蔚後起之人文善舉莫大焉是役也建議者曾文正公也經始於同治乙丑年落成於戊辰己巳年羣策羣力厚集經費者乃湘鄉

各統領將官久於軍旅者也其芳名另勒碑石文不備書董工
程者龍清垣劉盛德也與聞其始徐觀厥成並書此文以紀本
末者文正公之同懷弟名國荃也荃本愚陋惟具耿耿之忱夙
夜望吾鄉人士始終持挺然獨立之操習爲有用之學宣力以
報我

聖清是乃國家無疆之福亦卽宇宙運會之幸庶足以徵吾湘
不替之庥美後之君子景仰先哲當必聞風毅然而興起也乎

彭伯桂捐修南岳後山石路記

同治十二年癸酉歲吾湘義士彭嘉會議修南岳後山石路而艱於貲謀諸江右廬陵彭君伯桂伯桂率昆弟子姓慨然捐助金錢壹千八百串不再期而落成路寬五尺長萬幾千丈除險爲夷繩迂爲直行人便之億兆往來莫不歌頌伯桂之隱德屬余記載其事以爲爲善者勸余兄澄侯與伯桂交有年矣稔知其先世兄弟三人義聲達於

朝野長曰變廷次曰莫齋季曰清和一門雍睦怡怡如也吉安太守因以怡怡顏其堂而三先生日以啟迪後嗣讀書爲業暇則籌及生計億操勝算輒多奇中嘉道間寄跡潭州積儲益裕

於是湘楚搢紳士庶闐闐股實無論智愚貴賤莫不同聲歎美
仁之和之富而好禮積而能施矣仁和者彭氏之牌記也厥後伯
桂以在籍員外郎重來昭潭席承舊業益迪前光而於江楚兩
省義舉尤喜竭力贊成誼應創爲者則獨力以持之事當因勢
利導者則傾貲以濟之凡造橋修廟延醫施藥振孤恤寡救困
扶危固已三世力行而不怠抑且數十年如一朝也江西巡撫
劉中丞坤一嘗具疏以聞於

上旌表德門而彭氏子姓恂恂撝謙益自謹飭遐邇見者不知
其爲富貴之室咸同以來膺茂才食廩餼舉孝廉者代有其人
今且有已入館選并克主持

昭代風雅者是則三先生與伯桂諸昆季教澤流貽之長尙特
發軔之始耳昔人云享大富貴者必壽考易曰積善之家必有
餘慶吾觀彭怡怡堂以爲善爲樂彌信而有徵云

河神渠大王祠記

誠孚粟大王諱毓美諡恭勤生於齒渾源州以拔貢出宰河南卓著政聲歷縣令州牧郡守由開歸道升湖北按察使河南布政使道光十五年授東河總督精於治河嘗乘小舟周歷南北兩岸察其地勢之高下隄岸之險夷水溜之緩急順逆莫不洞悉原委形勝悉在胸次創築甌壩二千餘年自恭勤始至今北岸之原武陽武南岸自黑塌以上凡屬險要之區成壩鱗次恭勤之教也道光二十年薨於位吏民以流澤孔長立廟祀之其生也精誠常在兩河歿後屢著靈應數十年間每歲洪流巨險輒示形露跡呵護東豫居民百千萬家大吏順民之所請臚列

實事入告朝議以禦災捍患宜隆馨香之薦

勅封誠孚大王東豫兩省沿河許建專祠甚盛典也光緒元年夏國荃履河督任亟思修建廟宇以經費無出遷延久之其明年開歸陳許道德馨謀於彰衛懷道吳潮稟明河南巡撫李慶翔議集厥事慶翔欣然曰余撫中州兩河百縣奉神以恤民余之職也諭司道及眾官僚曰自古有功德於民社者則祀之禮也宜籌費以資之又諭德馨曰黃水所經號曰神河汝有管河之責宜度地興修以答神貺德馨於是夙夜維虔親率候補同知董克紹薛成琳遂於相國寺之西擇地一畝以爲基址鳩工庀材閏五月二十四日興工九月初三日告成共大廟五楹廟

前明廳五楹左右官廨十間大門三間樓閣俱備二門三間僧
房齋室十數間廟中佛龕仙仗錦幔彩旛悉具絢以金碧飾以
丹漆凡費金錢萬三千有奇廟成之日適當秋祭瞻拜之餘王
之聲靈如在其上自茲以往兩河士民咸被無疆之福又豈有
窮期耶禮既畢德馨正襟謂國荃曰宜有記國荃既具奏願
請

御書匾額荷蒙

聖恩頒賜四字伏託神庥躬逢盛事竊維王之功德載諸口碑
王之政績詳諸

國史王之靈應臚於志乘固無俟敷陳矣宜紀其建廟之日月

及與議贊成之員與一時守土同官諸姓氏壽之金石是役也
總其綱領主修者長白德馨也經營監修成於不日者董克紹
薛成琳也承巡撫之命贊厥成功者布政使劉齊銜按察使僊
壽彤督糧道陳世勳彰衛懷道吳潮也至於竭力集資俾毋匱
乏者則德馨吳潮率下南河同知陳桂芬上南河同知余漢中
河通判張仁普黃沁同知劉觀光祥和同知蕭彥申下北河同
知王慶琳衛糧通判秦培也守開封者馬先登也宰祥符者鞠
捷昌也國荃樂觀厥成謹書端末樹之廟門之外以告後之守
工職官及專司河務者是爲記

重修江南九龍橋碑記

凡天下之地勢兩山之間必有川焉大川之上必有涂焉大而
江淮河漢小而溝洫畎澮經緯地防三百三千莫不如此神聖
興起乃因磬折參伍以導其往爲之理遜約束以防其淫就川
上之地可通人行者以順其塗猶慮望洋莫及也乃剡木剡木
制舟楫以濟不通又恐民之病於涉也則有通徒行之杠更有
通輿行之梁其成也在於周之十一二月卽夏之九十月皆視
農功旣畢始用民力無者造之圯者修之歲以爲常毋或爽焉
王政之備如此夫乃歎體國者靖共夙夜不忘經野之規宜其
萬世利賴以至於不可紀極也司空掌邦國之事篇雖不存猶

有河間獻王考工記附於五官之後可以考百工之事秦漢以後學者不務實際或尙文而陋質或重儒而輕工爲士者遂不知飭材辨器爲何物盍亦試考三代聖人苦心經營之盛軌乎當是時王公坐而論之士大夫作而行之皆未嘗薄審局面勢之業而不爲形而下者之器皆附於形而上者夫固有道存於其間也智者制物巧者述之必守之世世而後可稱良工車以行陸舟以行水橋梁以濟不通皆聖人出其緒餘以利天下者也奈何呻吟佔畢舍此不驚競爲損下益上之策謬稱宏中肆外之規日夜脞削民間之脂膏付諸東流之一擲耶民生墊隘也如此如水益深也如彼將欲印須有道援手以拯天下之溺

而不可遽得吾恐沉陷滄苔而莫望登之衽席也吁可慨已誦
苦葉之詩深厲淺揭歌谷風之什方舟泳游伊誰度量以涉濟
伊誰匍匐以救凡伊誰泛容舟之艇載一葦以先杭伊誰乘浮
海之桴比三年而蘇僅茫茫前路渺渺余懷未可知也光緒甲
申年三月余由京師重到江南憚百廢之未興愧一籌而莫展
惴惴焉以弗克稱職爲懼雖曰物之成毀由乎數地之盛衰因
乎時然旣敗之於亂離之初要當修之於安集之後越九月官
吏來報通濟門外秦淮九龍橋落成司事者屬余作記余按其
狀曰橋爲甃凡五長二十八丈高二丈九尺寬四丈東南壘石
爲岸以禦湍流高一丈二尺長四丈費金錢萬數千緡又按規

畫茲橋以重厥成者番禺梁肇煌長白德壽鄞縣趙佑宸仁和
張富年祁門張銘堅廬陵劉佐禹也監修是役者華陽羅章長
沙李春藻藍采錦李章貴何漢也儻所謂學道愛人能拯閭閻
疾苦於熙來攘往之中者歟誠不愧父母斯民矣又來官茲土
者昌黎馬恩培孟縣田國俊桐城孫雲錦仁和陸元鼎石埭桂
正華憫水患之洊臻痛鴻雁之在澤爰與方伯梁公同心協力
撫卹飢荒羣有慈航渡世之志吾民亦幸得登岸從茲其庶有
瘳乎今旣慶橋之成是宜並書其名壽諸金石俾江南士庶咸
賡樂只之章余亦欣然誦周官恤民之義各矢同舟共濟之忱
尚慎旃哉勉力毋忽是爲記

劉致祥先生善行紀略

衡山劉秀才森柵與余兄子紀梁訂文字之交遂聯姻姪丁亥春持書來金陵訪余余以紀梁秉躬夙慎取友必端因善視之於是適館滬上又四月森柵自滬來謁言將歸省其親又云纂錄譜牒將成乞余臚列堂上嘉言懿行光厥家乘卽以上博二親之歡余因詳詢事實及其家世森柵肅然而起曰辱承垂問敢不敬述以對吾父名貞燮年已七十四矣致祥其字也吾母氏黃今年六十九歲吾大父諱亨瓊讎校經史數十年以諸生終老王父諱利時恂恂守父業蓋自高祖元杞公以詩書起家厥後不廢誦讀以迄今茲吾父仰承遺訓兢兢焉罔敢失墜嘗

夢一螺髻人與之語曰汝爲善當致福清晨起戶乃見朱書黃
紙布於地上其字模糊然隱約可辨筆畫多半道前世事末題
善福堂三字吾父驚而異之因與宵夢相符遂顏其堂曰善福
由是矢志行善不少輟吾父世居後山北港市上屋後舊有鎮
嶽橋九拱朝祝融峯頂者必由是路經過夏秋熙穰往來不下
數十萬人道光二十九年大水盈岸丈餘傾圮雁齒境內貧不
能修野渡無人印須甚苦冬令水涸民病於涉吾父慨然引爲
己任釀資重修自咸豐戊午歲至同治甲子凡七年落成至今
行人稱便若夫好行其德每月朔望輒出稻糧周濟窮困無告
者恆數百千人四五十年如一日此則長者之所嘗聞也森栢

既不忍有而不述亦不敢無而妄稱惟長者幸垂察焉余聞森
柵之言知先生與黃孺人以令德而享高年有自來矣竊念先
生少孤同懷昆季均早世家計蕭條年甫十四卽偕伉儷以奉
孀母菽水之歡讀書習字偶有餘暇輒於本市別尋生計撐持
寒苦之門戶既獲自食其力又能以仰事俯畜之所餘悉爲噓
枯育瘠之用由壯而強而老所積愈增而行善愈力人或以橫
逆拂意之事加之乃容忍不與之校嗟乎隱而不過於時濟人
利物尙且如此倘有一命之榮得尺寸之柄其博濟豈復可限
量耶吾滋愧矣又聞其訓子若孫也常懸楮言於壁不外勤正
厚廉四字違則譴訶不貸足見先生之性情質直勇於好善非

有所矯飾於其間也黃孺人秉慈祥之性助夫教子內外整肅
子孫皆克自成立蜚聲庠序觀於戊午森楷補博士弟子員適
當修橋之始甲子森柵名列膠庠正值橋工之成可以覘爲善
之報矣又況予子予季與諸孫咸接踵而發軔乎書曰作善降
之百祥易曰積善之家必有余慶先生修德於身久而彌篤精
誠足感神明夢寐若或告之昔也非以求福今也福自至焉如
先生之成效不已昭然可睹乎茲於森柵之將行也書此付之
以獻楹庭並質諸紀梁或謂余言之不謬也余旣備書先生之
善行兼紀黃孺人懿美之德繫之贊詞聊當期頤之祝先生其
莞爾而笑乎贊曰衡山之北涓水出焉有隱君子啟後承先祥

光滿室克享大年矢志救世利者萬千不求聞達惟慕前賢佳
耦曰配合德無愆婦隨夫唱如管應弦貽謀燕翼廣種心田桐
孫蘿施蔦舍絲牽一鄉善士宜列簡編碑載於道福錫於天箕
疇全備壽考宜延明神來告朱書可傳宜爾子孫科第蟬聯

旌表節孝羅門謝安人墓表

邑志與修耆老推余董其事見志所載節烈千計節而烈者約百計竊歎其難而幸其盛近又得節烈婦羅謝氏婦爲處士羅兼文妻居邑西七都梅塘蚤孤隨祖致元家塾課誦粗識字義能讀算十四歲歸羅越三年夫兼文省父長沙跌河死婦聞信得吐血嘔血症姑以藥飼之婦辭不服旁人或慰藉之亦有婉諷以他詞者婦不答亦若不解者然婦知其姑悲哀甚每哭夫不盡使姑知姑或言及夫死事則云須待翁歸爲信且臆翁或攜夫櫬歸也至冬翁歸不見夫櫬羅氏捧姑之袂侍言於翁詢夫死狀甚悉翼晨投所居門外池溺死時年方十七歲姑起覓

婦見繡履池邊乃撈得其屍面如生啟室內臥具則所製殮身
諸物一一妥備壁間粘單條列婦平日經手數目並詩云年纔
十一喪雙親祖命出嫁嬪羅門不幸十七良人故拋侍翁姑殉
夫身其弟來奔喪稱先時曾囑言身後事然後知婦之死志固
久定矣頃已採錄入志詳請旌表羅謝兩家更擬爲婦立後羅
故家微初蓋渴葬也里中諸君子爲修正其墓環以石索予表
其事於楔子維湘上山高水深風俗樸厚得天地清正之氣爲
多軍興以來忠義之節勇敢之名甲於天下蓋死者無慮數十
萬其幸而不死者皆百死之餘如予其一也顧戰陳以不死爲
僂夫人知之而慷慨赴義亦男兒之常不意婦人女子亦一意

孤行以節烈書於冊者且比比也如婦之從容殉節不尤可風乎嗚呼可謂盛矣可謂難矣爰表其畧俾來者有所觀感云

陳先生墓表

同治八年秋余友陳君舫仙廉訪自晉解組凱旋余謁之於會城舫仙語余曰此行五年勞苦患難靡所不經然幸未獲詛於晉鄙之士民差足以自信而自慰昔先大夫嘗戒湜曰治軍者無論統兵之眾寡要以能協民情爲本治吏者無論歷仕之顯晦要以毋撓人心爲順至於一身之通塞羣喙之傾軋皆在所弗計也此數語者湜每過庭時大人輒以爲訓湜謹志之弗敢忘迴憶聽斯言也其時四方固晏然無事耳何有於兵湜猶甫及成童耳曷敢希冀於仕宦今忽忽逾二十年矣不幸而皆驗之而湜皆親歷之先大夫其果有所見而云然耶此次歸來重

展先人廬墓不勝松楸之感明年卽當奉

詔於役關隴亟宜及時修墓立碑稍盡人子不匱之思維子克
知吾先世隱德甚悉曷爲文表諸墓道之南則賜莫大焉國荃
謹按先生諱開煦字喬莊號旭亭世居湘鄉之東鳳里以舫仙
貴

誥封中憲大夫晉贈光祿大夫曾祖諱憐曾祖妣王氏祖諱大
田父諱德棻均

贈光祿大夫祖妣丁氏妣左氏均

贈一品夫人生先生兄弟四人長曰開勳次卽先生叔曰開壽
季曰開照先生生而奇異孝友性成平居不妄言笑自幼習於

勤敏入塾誦讀佔畢之聲自昏達旦不少勦十歲能文名噪一
邑數應郡縣試每考必列高等道光元年補博士弟子越二歲
食餼於庠爲文根柢六經旁及前史諸子百家其精者以神理
氣味爲骨卽其不甚經意者亦不遺格律聲調之微吾鄉習舉
業者鮮不奉爲權度道光中葉以來弋獲科第之文稍卽於靡
矣作者不務己出降而習爲剽賊前後相襲郡省一律先生夙
好先正典型於文詞大得也乃以不屑務時尚故屢薦而屢屈
不得舉於鄉二十四年以恩貢生就教職先後課徒近三十載
主東皋講席又數年東皋者吾湘四書院之一也其院在城北
每歲履端之月延有德而能文者主之方是時學者聞先生之

至也爭相負笈聽講如客得歸先生一一繩以端士之法度陶以先儒之義理既使之敦品勵學以植其基復爲之據古證今以濟其文朝夕口講指畫窮入微妙令人帖坐而不忍退及其解席而歸也從而執經考疑者踵繼於先生之門先生溫顏霽色視之若親子弟故湘中成材之士至今感慕不少袁先生肫樸貌若無能而實負經世之才竟未得一試其用知季世之將有兵事也而豫嚴其後曰勿擾乎民知其子之必躋乎顯宦也而夙飭之曰必忠爾君乃皆及身見之何其識量過人之遠若是哉余以菲材幸睹先生光儀又得與舫仙爲總丱交咸豐六年嘗在吉州與舫仙共事帷幄每讀先生手書忠義憤發形於

楮墨而勛舫仙則以遇戰陣必勇待朋友必信務爲孝之大者不以區區侍奉左右爲亟余是以知舫仙之根於忠孝者深矣七年冬舫仙歸省甫抵里而先生病舫仙奉養無違越旬日而先生卒士林哀痛遠近弔哭僉曰善人死矣時咸豐丁巳十月二十三日也壽六十有二歲明年舫仙奉其柩葬於本邑東鳳都東區山塘沖杉山之原首丙趾壬同縣潘鴻燾伊卿嘗第先生之里居世次并志其易簣之訓俾舫仙泐石以藏諸幽舫仙負土成阡百日甫畢於是有西粵之役矣先生配杜氏初封恭人晉贈一品夫人後先生四年卒葬本邑三坊花橋區大塘沖尾扁口山夫人生子七人男一女六男曰湜卽舫仙女長適翰

林院待詔銜蔡信藩次適國子監典簿葛封鑑次適奉直大夫黃文煦次適譚肇垣次適國子監典簿沈台烈次適分發補用縣主簿李源孫男三人翼善翼仁皆樸誠好學翼棟尙幼孫女四人咸豐九年舫仙平粵歸畱湘養病會劇寇石達開領蟻眾十數萬由江犯楚突圍寶慶舫仙以一旅之眾會合湘軍馳援三月克之賊遂間道西趨逾年而蜀患平十年舫仙益軍東下進次皖北從余兄今相國毅勇侯防剿東流建德明年渡江與余軍攻克安慶同治元年舫仙又與余剷除大江南北兩岸各名城要隘七百里進屯金陵先是駐兵運漕舫仙得家書以十月丁杜太夫人憂遂遺其營於江之南岸而以從弟膺福及吳

光春權領之師次雨花臺二年舫仙墨經回營克江東橋三年
六月克江甯石城凱撤還湘設家祭虔告於先生之靈從遺命
也吾觀舫仙久於兵事靡盬不遑實爲中興有數之勞臣而自
底定東南遺屯西北又復五年捍衛晉邊屏蔽畿輔功非隱而
不顯也跡其况瘁以全民命艱難而集奇勳固出於公忠體國
之至性而要非先生之教豫立乎前曷克臻此於戲先生之學
化導於湘中多士者溥矣先生之澤流貽陳氏後昆安有不極
於十世百世者乎爰爲歌詩以表之其辭曰漣水之濱五峯之
麓有隱君子靜深肅穆喬莊其字號曰旭亭克修於家靡獻於
廷積學爲文詞無支蔓後進楷模士有成憲篤生名將勳望兩

崇揆厥提命實裕教忠旣闢吳疆往捍晉鄙頌者輿人謗者膺
仕純臣蔑視等若浮雲謂承親訓惟報吾君馳驅廿載甘之如
飴生還奏凱爲立豐碑於維先生終歲好道疇克方之太邱一
老膝下簪纓厥施方盛先生穀貽福畀子姓遇豐於後德積厥
躬伐石銘辭以詔無窮

祭張聲揚軍門文

嗚呼矯矯聲揚萬夫之傑忠孝性成一腔熱血既邁時難結髮
從戎崛起草澤從事羅公忠節既亡旋歸故里撫劍悲詫痛哭
知己歲星倏易龍尾伏辰子也奮袂整旅廬陵惟君慨然重來
殺賊所至先登髮指齒裂忍饑茹苦百戰身經退生爲辱進死
爲榮六月之役伏殺流血首下屍高鼓音不絕枕戈磨盾誓不
生還預防賊突軍次曲灘吉州告復景鎮浮梁乃蹶乃招轉戰
不遑尤著威聲曰小池驛賊老而曲我壯而直援賊初敗遂進
全軍圍攻二年以克皖城無爲巢含以次進戰更輟和州馳騎
傳箭破竹之勢渡江而南斬關奪隘以定以戡照我旌旗榴花

粲粲爰薄金陵拯其糜爛上下千里終始七年裹創血戰我後
君先方冀良材宣勞爲

國神威是奮電埽吳越趨獠狗反噬倏來九鉛飛空竟以成
災曾未十日便已隔世我方鏖戰君魂遽逝昇櫬湘南永奠君
靈迴首往事泣下沾襟念君之知億則屢中霆發颯馳妙於罄
控念君之謀慎而能成處女脫免從無震驚念君之勇戰有必
克摧鋒陷陣罔不辟易今則已矣君不助我曰戰曰守馳驅道
左將才之難天下共情匪子阿私獨爲君泣况君身世內顧尤
悲上有老母下乏孤兒寸草有心春暉莫報皇天無知嗟爾伯
道爲君一慰

曠典飾終懷烈常存毅魄英風魂歸故土無驚無怖楚些寫哀
埋君玉樹聊陳薄奠表我微忱君靈不昧尙其鑒歆

祭季弟事恆文

同治元年壬戌歲十一月十八日卯時吾同母弟事恆歿於金陵軍次卽以是日酉時殮殯入棺越二日昇櫬登舟又三日國荃爲文述其哀忱向事恆靈柩前而哭之曰嗚呼季弟何逝之速也戎馬干戈之苦弟嘗之渥矣不死於寇賊之手而死於病魔之糾纏以吾弟體氣之強又能自葆其天真而卒出於此詎吾之所及料當亦吾季所未嘗自料者嗚呼慟矣弟本奇男子英姿伉爽不循循於尋常軌塗然每至奇之中仍不失平正通達之度凡人世之謂形聲空色與夫窮通得失榮悴壽夭可欣可戚爭趨爭避之境世或務之竟死而不疲而弟視之蔑如謂

務此不足尚也其識奇矣然總計生平之所遭其命亦奇窮而其遇亦奇苦弟自束髮授書後大父母父母恆鍾愛之弟未嘗恃愛而驕也諸昆遊宦務學或遠在四方教弗及焉而弟亦不以不教而失謹也歲庚戌縣試冠軍院試又冠軍方是時大父母以下世而弟遂無意於科舉之學矣壬子六月母氏棄養其時粵寇犯我楚癸丑歲伯氏練鄉兵討賊以勤

國家之亟弟實率一旅從之是冬擊賊於常甯之洋崗克之返旆衡陽甫下馬卽力舉彭公雪琴楊公厚庵於伯氏之前謂將來能助兄乎此賊者楊彭其必最著乎是不可以辱諸吾幕宜顯擢之令獨當一面伯氏遂信任之今海內所稱彭楊水師是

也其知人之奇識有如此是年三月岳州之戰官軍以眾寡不敵敗北羣奔諸將多有諉過於人以求自全者弟獨抑然自下惟慮兵事之無緒平賊之尙無期也乃旋里閉戶讀書移館於予田山中之敝廬託以自潛丁巳二月嚴親見背戊午十月同母兄溫甫先生戰歿於三河弟獨奮激悲傷慨然有殺賊復仇之志己未年遊覽重湖時胡文忠公撫鄂知弟有奇才令召募千人成軍名曰湘恆營駐黃州練兵二十日由松子關進兵庚申二月克太湖縣城四月師次安慶集賢關此吾兄弟會兵討賊之始也相與籌畫戰守布置老營以長圍困賊其名則令出於吾其實皆謀出於弟至辛酉八月朔乃克之然安慶之戰弟

功多爲吾所掩弟更自讓其功求爲溫甫兄易名蒙

帝錫諡曰忠愍弟以溫兄之名不終於湮沒其心稍暢乃又大
病而垂危運之屯蹇亦又奇矣九月弟扶病率師守樅陽壬戌
正月率師渡江深入次三山二月初七日弟婦鄧恭人以疾卒
三月訃音至營其時強寇十數萬環圍弟軍危險萬狀弟目中
無慮率所部迭戰皆勝旬日賊大創而去遂進克繁昌保全三
山難民十餘萬眾並賑粥以活之又約會水師抬船入小湖而
自率陸師力戰克復魯港又進軍克復南陵四月又克蕪湖皆
弟慘澹經營以謀奪劇賊所據之天險而卒不自以爲功卽上
之論功者亦弗及焉五月率眾五千人與吾會兵金陵城下謀

攻洪逆老巢前拒城賊後禦援賊數月之間心力交瘁嘗謂吾
曰弟命不如人不宜以軍功獲榮祿今歲不進官階幸也或可
免他慮矣乃七月八月弟以積勞病瘡瘡甫愈而僞忠酋侍酋
率黨六十萬大至以謀我軍環攻四十六晝夜方極危至險之
時吾深恐此軍不克自全弟乃獨當西路保全糧運更以其餘
力救我東路之急苦守力戰凡死賊四萬有奇解散之賊將及
三萬皆弟與諸將之力也十月初五日擊破援賊初八日弟方
與厚庵軍門俯視九洲之賊此時此際雄心何其壯耶初九
日得病日益彌留不起百藥罔效呻吟於床褥者三十八日又
何其苦耶病中譖語猶不離叮嚀守濠殺賊之事而無一語及

其身後之私又何其忠而且達耶臨絕呼籲痛楚之音悽咽悲
吟別我而去如江河逝水之不可遏留抑何決耶曰嗟予季汝
何往耶三千里歸魂故土而余不能扶弟櫬還鄉使弟神魂無
所憑依世有可哀之情孰甚於斯者耶嗚呼慟哉才長千人曰
英萬人曰俊卽在異姓之僕猶不忍執手視其萎謝矧我與弟
情則手足誼共憂患今纔三十五耳又何其逝之速耶大功未
竣羣賊在前我在軍中此後與劇寇相持克贊畫大計以輔吾
之不逮能直言吾之所短更復聯絡水陸諸將使之各盡其所
長以伐賊謀者又其誰恃耶嗚呼慟哉天速奪我季弟何其太
忍哉惟我與弟相處最久幼同嬉戲長同遊學世亂以來同營

四年迴憶庚戌七月讀書嶽麓山中我病忽危氣奄然欲絕弟
實咀嚼參餌以活我十月舊病猝發於家弟更用奇方以起我
丁巳六月奔喪在籍病氣沈重醫人莫察其由誤以涼藥陷我
瀕於危殆者三日弟乃親易補方煮藥特進以救我兄弟師次
晚吳四遇如毛之羣寇弟皆擔當一面護救百端轉極危而爲
安履至險而如夷生死而骨肉歷歷數之如在目前今弟倏罹
疾病之厄我乃坐視而不能拯負心抱疚悔恨何窮能不悲耶
脊令之痛宇宙皆有同情惟弟何其明健惟我何其庸碌旣歎
報德之無由益傷骨肉之永訣我實負弟茹恨終古弟沒三日
我猶嗚咽不能成聲賴諸將之扶持已昇弟櫬登舟矣過安慶

時伯氏當題爾之主也銘旌爾之靈也且當爲文以紀爾之幽室也旋里之日仲氏能迎爾之櫬瘞爾玉魄於吉域也能令爾孤子紀渠負土以成爾之阡而封崇爾之墓也明年余倘能幸完全陵之役必乞歸田里拜弟之墳以展余無限之哀思也爲弟建祠以妥汝之靈而崇汝之祀事也且當謀改厝鄧恭人以葬弟塋之旁也紀渠教養婚娶之事吾與仲氏當同任之也弟營部曲吾必厚視之毋令失所卽以成吾弟討賊之志也弟靈有知毅魄能殲悍賊今雖賢志而沒尙其陰有以相予也弟沒四日乃奉十一月初八日

諭旨始蒙

聖恩以知府補用方

天眷之下頌正弟病之已篤悵

綸音之倏至傷賢將之先摧其生也數奇其死也名成畸人傑
士之所遇大抵如斯乎嗚呼是誠可哀也已詰朝弟櫬挂帆上
駛歲暮當抵湘南嗚呼魂歸故里道阻且長水深浪闊毋怖毋
驚惟余以悲痛之至情不能成文撫棺一奠相對號泣聊述吾
弟平生之厚德與吾必思所以報弟之意以寫吾哀事恆有知
尙其聞此語而歆鑒之哀哉

祭伯兄文正公文

自聞兄訃今逾三月哭不成聲慟斯次骨生弗能事友恭道闕
背面八年未嘗奔謁林下之游相期白髮豈意願違倏焉以沒
哀我父母生我五人弟性頑鈍兄志如神愛憐諸弟白首若新
吹簾仲氏克稜天真奇才愍烈竟死不伸予季靖毅行役苦辛
一病不起與鬼爲鄰我在人間今亦五旬退休里閭旣吟且呻
五十年中憂患飽更未及垂暮哭我伯兄伯也執殓紛爭以平
國賴締造民慶再生百寮有長諸侯齊盟功成身死實哀實榮
朝野同悲矧予友弟兄沒江南我居湘邸殮不憑棺莫不薦醴
何兄友于而弟不悌迎柩長沙哀鳴出涕中夜以思厥賴有泚

會品集卷下
兄念鞠子視之一體弟因人成兄實天啟壯士挽河甲兵一洗
運際遷流誰知所底惟兄之存恃以無恐君子見義必爲斯勇
羣小縮手不寒而悚夔典秩宗皋有邁種今其已乎誰荷

天寵

國無師保野鮮承奉下哭其私反位成踊以我羸弱豈能任重
不學無能何異鬪甘辜負教訓四十九年昔我乘氣自謂無前
兄裁以義翻不謂然一再試世重蹈而顛弟以剛折兄以曲全
迄我知德兄沒九泉誰與論道口不復宣望靈垂涕鳴原百篇
憶我髫齡相從京國兄官檢討不遑日昃寒暑不時我弱是賊
兄旣藥之徬徨我側百拜終宵虔祝斗北我病旣痊喜形於色

解手南歸勗我以德一別十秋燕城楚域渺矣慈雲恩同罔極
相見之初五經俱墨時逢百六盜起如毛中原鼎沸孰諳六韜
惟兄天挺僉曰人豪

成帝顧命猶典禮曹朝陽鳴鳳眾議莫撓

顯皇善任授以旌旄不辟金革罔憚劬勞持節誓師興於桑梓
博集羣策折衷一是我有贈言謂我不鄙明條三十今猶可紀
遂創楚軍爲角爲犄稅駕衡陽舟師之始水有彭楊陸有羅李
規復岳鄂迅如彈指天未厭亂兵鈍鄱陽兄保江右重理帆檣
蠟丸爲書閒道來湘我始聞之勢轉倉黃廬陵太守謂我克當
授我一旅駕言騰驥章貢合流一水相望書生從役將父不遑

忽報樁墮地老天荒兄旣星奔弟亦匍匐荆棘滿塗蓼莪廢讀
我克吉州兄已起復相晤建昌營次信宿任我休沐返吾初服
如有禦侮後先惟叔警諸股肱輻共一轂旣平景鎮遂下浮梁
從軍盡瘁息偃在牀風雨之夕兄詔我旁謂我年少膂力方剛
世猶多難兵且未揚閱人孔多惟子其良甯捐尺短毋棄寸長
東征之役與子翱翔練兵太湖全皖在握我爲前驅兄籌帷幄
移駐祁門與賊相角同時被圍警書頻數軍不可撼安如山嶽
江南之定惟此卓卓竹帛銘勳獨能揚摧迫克安慶兵機益利
大鵬圖南扶搖展翅小鳥託巢因風不墜兄制兩江位冠羣吏
弟爲屏翰

詔許毋避兼親與長寡雙少二飛軍以東于我一幟濟師助我
恐失右臂風利不泊徑抵石頭屯兵城下自夏徂秋環攻百道
冀伐賊謀豈知逆命復來狡酋方張之寇百萬爲讐我方被困
兄切隱憂一戰卻敵賴有貔貅捷書夜至有庸必酬二月初吉
輪舟來訪椎牛犒師徧及諸將並馬而行詢余以狀痛鉅創深
何幸無恙余敬告兄堅忍爲上九地九天十決十盪以靜制動
敢與相抗兄聞茲語彌深惆悵又越一朞乃告成功匪弟之力
抒兄之忠

帝嘉乃績異數同蒙我苦軍旅旣疲且癘告歸局促別緒慙慙
自茲以後尺素惟通兄渡江淮小大從公削平捻逆仍返江東

我奉

簡命八州作督比匪之傷謬獻忠告志未克申知足不辱退賊
遂初如垢獲浴兄負重望華夷瞻矚移節邦畿明刑謹獄首夏
清和病在牀褥忽報海氛西人來毒眾議洶洶津門沸騰兄鑒
覆轍如不克勝孚以誠信示以準繩如有不測與躬俱腐爲
國受垢社稷所憑彼鹵莽者妄肆愛憎譬諸朝菌晦朔自矜又
若夏蟲語及於冰惟兄謙退不矜智慧盛德若愚艱難宏濟返
旆東南謳歌慈惠久任仔肩曾不少憩大閱既畢小心益勵公
餘之下游於文藝冀享遐齡掌

帝之制何期中道棄我而逝嗚呼哀哉天寶爲之民哭於巷墮

淚有碑誰興百廢誰守四夷

兩宮之慟

一人之思閔予小子事兄如師死休生闔誰其我知放聲一哭
奠此哀辭於戲我兄畢世勤劬名垂宇宙遺憾毫無克家有子
能紹楷模諸孫林立清聲鳳雛教誨之責我與兄俱九京瞑目
尙鑒余愚

祖考星岡公冥誕奠文

伏以春爲歲首龍德正中三陽開泰萬國皆同嶽降嵩生實誕
吾祖爲世之瑞承天之祐衡湘渾噩教化未開泊乎吾祖宇量
宏恢禮樂詩書薰陶梓里萬葉穀貽百代翼子誰不食德誰不
服疇修之斯吉福自己求我祖在天巍巍赫赫含笑一視聲施
四國祖母覆育澤及孫曾鳳毛迭舉鴻翮高騰我父我叔孝洽
鄉黨世稱象賢能以善養守成匪易創業良難緬想祖父稼穡
維艱忠厚開基冠帶滿室入孝出忠春華秋實百爾孫曾世守
縹緗懷茲遺訓莫敢或忘歲逢庚午籌添海屋九十有七聚族
而祝龍游於郊鳳翔於野鳴盛和聲廣風奏雅伏維英靈來歆

禮記保艾爾後錫以繁祉

光緒辛巳夏六月祭湘楚陣亡將士及殉難士民文

蓋聞袍澤同仇民知敵愾干戈衛國童可勿殤是以化碧血於
三年萇弘表烈祀絳旗於十月蚩尤有祠矧復千里從軍再清
寰海一朝裹革終古沙場匪緣誅士之文曷慰致忠之魂蓋自
修蛇薦食小鼠跳梁百越蠻煙無復樓船之阻長江天塹偶疏
鐵鎖之防爰據秣陵遂成草竊虔奉

國威恭行

天罰銜旗所指奠八皖之江山鐵壘對持望大江於南北雖復
有征無戰仁人無敵之師惡殺好生帝者如天之德而將無必
勝兵在兩危城上車衝布再懸而終斷陣前旂動鼓三作而必

衰丑父之肘已傷驂因絙木先軫之元未返胄早結纓風鶴頻
仍蟲沙變花將軍一去已矣生平壯士不還悲哉烈氣復有銀
濤雪浪青雀黃龍攘臂一呼捐軀孤往一池鵝鴨且亂軍聲干
里舳艫詎無墨氣是以昆明池上武帝旌旗龕楮山前越王弓
弩或葬身於魚腹或掬指於舟中若夫六代煙花一場瓦礫泥
塗黻藻管蒯雲荼弔人士於彼都緬冠裳於上國亦有崑崗流
焱砮砮借球璧俱焚洪水襄陵泰岱與培塿同浸巢傾破獍城
毀殃魚是誠陽九之厄期殆亦元二之劫運夫以方趾圓顛之
眾當銅頭鐵額之兇紺轅黛耜之良嬰白骨黃沙之慘縱使飾
終身後幸列國殤誓死生前不存戾氣而孤墳白草長夜青燐

父思子而成臺妻望夫而化石山高灣嶽幾疑京觀之遺水咽秦淮不減平陰之哭遂使斷鬚溫序久客思鄉嚙舌張巡孤城埋恨瞻念荷戈之烈敢忘酌奠之儀今者

皇路夷庚人樂車書之會天河洗甲兵銷日月之光幸底定之新猷念成勞於舊壘雖承休沐遠阻河山特遣安徽候補道吳某虔修佛會度爾忠靈擇於六月某日設壇某日圓滿從此法雲布澤慧日流輝拯浩劫於紅羊表精忱於汗馬魂遊清淨咸結草以報

國恩世際

昇平向轉輪而成善士靈如不昧尙其來歆

光緒辛巳夏六月爲湘楚將士薦福文

伏以大節炳日星萬古有不磨之氣而忠魂泣風雨九幽無不發之光匪資龍象之靈疇濟熊羆之厄溯自粵氛擾攘楚地沸騰旋負固於秣陵遂相持於天塹率茲義旅張我

國威由皖而江而吳大小數百戰自將而弁而士子弟八千人或駕駛江中風雲變色或摧堅城下矢石叢身靡不血染龍沙魂迷鶴浦關山月黑草木燐青鬼如有知誓爲厲以殺賊人誰不死雖沒世而留名凡此鋒鏑之餘皆我股肱之彥傷心慘目怒焉久之茲幸寰海波平馬革無輿尸之慘回憶皖江雲隱蟲沙生舊部之悲雖

卹典屢頒沐

皇恩者已千百輩而忠靈未奠沈苦海者將二十年至脇從雖云罔治奈玉石而俱焚良善亦有何辜竟池魚之殃及固同歸於厄運實負疚於微軀謹遣官安徽候補道吳某虔求佛蔭允度幽靈值佳節於中元設盂蘭之勝會諏於六月某日開壇至某日圓滿伏願祥雲布澤慧日流輝拯浩劫於紅羊證聖經於白馬從此再生樂土荷慈悲普被之仁庶幾一瓣心香抒往昔同袍之痛

題晉陽榜書吏馬威遐齡韻事 并序

余以諸生從戎十餘載洊擢浙撫同治四年六月簡授
晉撫因病未能履任上疏乞退 詔許養病未蒙開缺
五年正月湖北擒匪充斥調鄂撫光緒二年八月由河
督重授晉撫明年四月接篆視事時值大稔民間十室
九空凡屬行路之人莫不盡馬心傷矧余官斯土乎撫
綏三載咎塞兩儀幸荷 朝廷矜恤蠲賑頻頒越二年
歲在己卯五月初九日大獲甘霽子遺略有生機八月
鄉試 大典多士近五千人浙江周珊梅太史山東吳
玉生主政適來典試是邦余忝監臨廣夔堂觀察爲提

調莊晉階太守爲監試夔堂談及鎖院舊事云有藩署
書吏馬威者年近八旬寫榜二十七科猶矍鑠也因檢
遐齡韻事見示余口占七絕十章書於卷尾

鋒鏑餘生十載前榮華過眼說因緣晉陽畢竟來持節又值賓
興貢士年

噉鴻百萬澤中過聞道子遺士未多天爲讀書畱種子儒生輻
輳咏菁莪

熙朝遠邁禹湯賢不數周宣雲漢篇發粟散財傾海內從知
聖德果如天

潮來八月逢仙侶濟貫洪河氣味清愧我棘闈簾外坐蒸潮射

策一諸生

矮屋無譁葉有聲
爐煙九轉已丹成
桂花堪摘乘時摘
文苑驚人重一鳴

傳聞絳老走凡塵
吏隱薇垣六十春
猶抱四朝成案在
淋漓快寫筆如神

民瞻若虎非今日
官疾如仇自昔時
刻木像形期不對
多君鎖院口畱碑

大漢關中吏亦侯
三章約法足千秋
迄今案牘畱餘韻
秦晉由來古帝州

執筆曾書廿七科
如香佳士聽鳴珂
品題十倍增聲價
眼見兒

孫上大羅

公門修積豈尋常薄善微長感上蒼自古在官皆有祿伊誰似
汝壽而康

題葆芝琴方伯棣華芬馥圖

刺史雍容七尺軀行年二十綰州符維時全楚猶多難君吏瀟湘我役吳

昔我與君相見始小林夾畔夜橫舟中流擊楫須臾事已歷蟾圓廿四秋

長沙賢守是詩人緯武經文少比倫耆舊至今傳盛業如來金粟證前身

蛋雨蠻煙不記年沈淪滄海變桑田銅山帥節君陳臬

聖化由來萬里宣

有詔傳宣到七閩八年膏雨兩番新鯨鯢跋浪無消息獨具孤

忠感百神

仕宦真如累積薪
屏藩南服幾多春
同舟共濟偏憐我
鶴髮蒼顏老部民

兩河百邑皆荒土
十室九空無晚炊
賴有使君甘露滴
黎民從此慰祖飢

來時楊柳正依依
瞬屆春濃絮又飛
我幸雲山今有託
田廬長挹幅巾歸

今朝上策捐逋賦
明日移文乞緩征
大廈萬牛迴首力
殷勤祇爲勸春耕

河渠溝洫慢千滕
百廢當年久未興
試上高樓憑眺望
如川已

見日方增

南關義學比甘棠童稚書聲達路旁
共道苞蕭凡黍茂郇侯姓氏更流芳

每遇公餘放兩衙清芬一誦一咨嗟
法書名畫畱陳迹夜雨聯牀韻棣華

八龍旬氏共齊名壽骨原來勝弟兄
走筆題詩紈素尾與君重訴宦遊情

題管敬伯讀雪山房圖

懸車方息影，朅來遊洛下。俊才接翩翹，故交蓋云寡。管君繩祖武，無忝名世者。哲弟陸士龍，契我同一冶。芝蘭堪競爽，相期邁高雅。踔躒文翰場，嗜古搜片瓦。每蓄匡時略，馳驅逐戎馬。披覽讀雪圖，韻事尤揮灑。述舊潘安仁，尋幽孟東野。夙哦韞山集，元音鳴九夏。遺宅贖京華，往迹畱騷社。畫冊毀兵燹，根觸談燈炮。遷流數十年，硬黃幸重寫。深雲翳樹根，清湍激春瀉。蘊廬念民物，抗懷追董賈。蘊真愜所遇，自得何外假。敲詩剪銀燭，看劍引瓊學。狂瀾際砥平，共祝承大嘏。

自鄂還湘次韻答申夫方伯

未步金鑾上諫坡，曾看吳楚起沈疴。
言歸此日江之永，但願來年海不波。
魚美武昌春意薄，雁回衡岳別情多。
棗梨薑芥誰相贈，且向漣溪問釣蓑。